

Mak bilong trupela bilip.

Moning.

Pasin bilong harim lotu em i no mak bilong trupela bilip, nogat.

Luk (man i raitim buk Aposel) em i diskraibim mak bilong ol manmeri i bilip, em ol manmeri i kisim na holim trupela bilip long feitul wok bilong Jisas. Ol i no save bilipim na trastim ol narapela samting olsem baptais, o pasin bilong lukautim Sabat, o stretpela pasin bilong ol, o ol kainkain samting olsem. Nogat. Ol i trastim tok bilong God na ol i trastim rot God i makim bilong kisim bek sinmanmeri. Em olsem na ol i bilipim na trastim God long kisim bek ol long feitul wok bilong Jisas tasol, na ol i bihainim Jisas tasol.

Lukim **Aposel 4:32-37**....

³² Olgeta manmeri i bilip ol i stap wanbel na ol i gat wanpela tingting tasol. Na i no gat wanpela man bilong ol i tok, "Samting bilong mi, em bilong mi tasol." Nogat. Olgeta samting bilong ol, em i bilong olgeta wantaim. ³³ Olgeta taim ol aposel i tokaut long BIKPELA Jisas i kirap bek long matmat. Tok bilong ol i gat bikpela strong. Na grasia bilong God i pulap long ol olgeta. ³⁴⁻³⁵ Sampela bilong ol, ol i gat graun na haus i stap, na wanwan taim ol i salim ol dispela samting na kisim mani. Na ol i karim dispela mani i kam long ol aposel, na ol aposel i skelim long husat manmeri i nidim sampela helpim. Long dispela as i no gat wanpela man o meri bilong ol i sot. ³⁶ Wanpela man, nem bilong em Josep, em i bilong ol lain Livai na em i bilong ples Saiprus. Ol aposel ol i givim narapela nem Barnabas long em. As bilong dispela nem i olsem, "Man bilong strongim bel bilong ol manmeri." ³⁷ Em i salim wanpela hap graun bilong em na kisim mani, na em i karim dispela mani i kam long ol aposel.

Bilip, *trupela bilip*, i save kamapim 2-pela samting long laip bilong ol manmeri i kisim na holim trupela bilip.

1. Trupela bilip i senisim bel na tingting bilong ol na ol i sindaun gutpela wantaim na ol i strongim lavim bilong ol *long ol* wantaim.

Lukim **lain 32**. Luk em i stori long manmeri i bilip, em ol manmeri i kisim na holim trupela bilip. Ol i wanbel na ol i gat wanpela tingting, na ol i strongim lavim bilong ol na ol i serim olgeta samting bilong ol wantaim.

Na yumi mas save olsem, ol dispela manmeri i bung i stap, sampela bilong ol i *wanlain*, na sampela bilong ol i *narapela lain* olgeta. Yu save, Jerusalem i olsem ol taun bilong yumi. Long taun i gat planti manmeri i kam i stap na yumi no save ol i husat. Em olsem na taim sampela bilong ol i tanim bel, na ol i bilipim na trastim feitul wok bilong Jisas, na ol i bung wantaim, orait sampela bilong ol i *wanlain*, na sampela bilong ol i *narapela lain* na ol *narapela klen*. Ol i manmeri bilong *narapela narapela hauslain*, tasol taim ol i kisim na holim trupela bilip wantaim, orait ol i sindaun gutpela wantaim na ol i strongim lavim bilong ol *long ol* wantaim.

Ol i narapela narapela hauslain, ol i narapela narapela klen, na sindaun bilong ol i narapela narapela tu. Sampela bilong ol i gat mani na sampela bilong ol i no gat mani. Sampela bilong ol i sindaun gutpela na sampela bilong ol i rabismanmeri. Long taim bilong ol aposel, ol dispela kainkain manmeri ol i no inap pas wantaim. Nogat. Ol mani manmeri na ol rabismanmeri ol i no inap sindaun wantaim na pas wantaim na pren wantaim. Ol i no inap kaikai wantaim, na ol i no inap kam slip long haus bilong ol wantaim, na ol i no inap toktok wantaim. Nogat. Wanwan taim ol mani manmeri ol i ken i tromoi liklik toea long ol rabismanmeri, tasol ol i no inap sindaun na pas na pren wantaim ol.

Ol manmeri i kisim na holim trupela bilip, orait ol i kainkain manmeri olsem, sampela ol i mani manmeri na sampela ol i rabismanmeri. Tasol ol i stap wanbel na ol i gat wanpela tingting, na ol i sindaun wantaim, na ol i pas wantaim, na ol i pren wantaim, na narapela i lavim narapela. Pastaim ol i stap longwe longwe, separet separet, tasol nau ol i pas wantaim na pren wantaim. Em olsem na yumi ken i save olsem, bikpela senis i kamap long bel na tingting bilong ol. *Trupela bilip* i senisim bel na tingting bilong ol na ol i sindaun gutpela wantaim na ol i strongim lavim bilong ol *long ol* wantaim.

2. Trupela bilip i *slekim* tingting bilong ol long ol graun na mani na kago samting bilong dispela graun.

Lukim **lain 33-37**. Ol manmeri i kisim na holim trupela bilip, pastaim ol i stap olsem ol narapela manmeri bilong dispela graun, na graun bilong ol, na mani na kago samting bilong ol, em i bikpela samting long ol. Tasol, nau nogat. Taim ol i kisim na holim trupela bilip, orait dispela trupela bilip i senisim bel na tingting bilong ol, na ol i wanbel long lusim graun na serim mani bilong ol long ol narapela manmeri i bilip na i stap rabismanmeri.

Pastaim tingting bilong ol i strong long holim graun na holim mani bilong ol. Tasol nau, trupela bilip long feitful wok bilong Jisas i *slekim* tingting bilong ol long ol graun na mani, na ol i wanbel long lusim graun, na yusim mani bilong ol bilong helpim ol nupela brata na sista bilong ol i rabismanmeri na ol i nidim sampela helpim. Tingting bilong bel bilong ol long graun na mani na kago i senis, na ol i bihainim nupela tingting long bel bilong ol.

Na yumi no ken i paul long dispela nupela pasin bilong ol. Taim ol i helpim ol brata na sista i stap rabismanmeri, orait ol i helpim ol *fri* tasol, ol i helpim ol *nating* tasol. Ol i no mekim pasin yumi save lukim long ples bilong yumi. Nogat. Long ples bilong yumi, ol sampela manmeri ol i tingim olsem, “Pastaim mi givim liklik hap samting, orait bihain mi ken i kisim bikpela hap samting.” Long ples ol sampela manmeri i tingim olsem, “Pastaim mi helpim ol, na bihain ol i ken i bekim bek na helpim mi long ol sampela samting.” Ol manmeri i bilip ol i no kisim dispela kain tingting. Nogat. Taim ol givim ol samting, orait ol i givim *fri* tasol, ol i givim *nating* tasol, na ol i no tingim olsem bihain ol i ken i bekim bek. Tru tumas, bel na tingting bilong ol i senis na ol i givim helpim bilong ol *fri* tasol, ol i helpim ol *nating* tasol.

Na tu, ol lidaman bilong ol, ol i no semim ol na fosim ol long lusim graun na givim mani bilong helpim ol brata na sista i stap rabismanmeri. Nogat. Yu save, long ples bilong yumi, sampela taim ol lidaman ol i makim ol wanwan femili na ol i makim hamas mani ol i mas givim, na ol i raitim nem bilong ol long pepa, na sapos ol sampela femili ol i no givim mani, orait ol bai semim ol bilong fosim ol long givim mani. Em olsem tasol ol manmeri i kisim na holim trupela bilip, ol lidaman ol i no semim ol na ol i givim mani bilong helpim ol brata na sista i rabismanmeri. Nogat. Bel na tingting bilong ol i *senis* na ol i *amamas* long helpim ol nupela brata na sista bilong ol.

Ol brata na sista, ol manmeri i kisim na holim trupela bilip, orait dispela trupela bilip i senisim bel na tingting bilong ol na ol i sindaun gutpela wantaim na ol i strongim lavim bilong ol long ol wantaim. Na trupela bilip i *slekim* tingting bilong ol long ol graun na mani na kago samting bilong dispela graun na ol i *amamas* long helpim ol brata na sista bilong ol i rabismanmeri. *Trupela bilip* i save senisim manmeri olsem. Manmeri i kisim na holim trupela bilip ol bai lukim dispela kain senis i stat long kamap long laip bilong ol.

Glenn.

Sapos yu laik save moa long dispela tok, orait yu lukim Aposel 4:32-37 long *Autim Tok* long www.pngbiblesources.org.